

La producziun ha entschiet

Igl emprem latg ei vegnius furnius alla cascharia regionala a Mustér/Salaplauna

DA HANS HUONDER / ANR

■ **L'infrastructura per la cascharia regionala nova a Mustér/Salaplauna ei pronta per la producziun. Il mardis avonmiezdi ha l'equipa dils signuns obtenu i gl emprem latg dils purs dalla regiun, ils commembers dall'Associazion cascharia Mustér. Naven da gievgia vegn produciu regularmein caschiel, en emprema lingia caschiel da muntogna grischun.** Di da legria per la Sennaria Surselva SA e per il Center sursilvan d'agricultura. Il mardis avonmiezdi ei igl emprem latg vegnius furnius ella cascharia nova ed il decan dalla claustra da Mustér, pader *Vigeli Monn*, ha nezegiau la caschun da benedir ils stabiliments gest erigi, recumandond quels alla protecziun dil Turpussent. Il medem mument ha el battegiu ils treis tschalers da caschiel. Els portan ils nums dil patrùn dils signuns s. Luzius, sco era da s. Benedetg e s. Placidus.

Entschatta dalla producziun

Il mardis avonmiezdi ei igl emprem latg vegnius furnius ella cascharia regionala nova a Salaplauna. Suententer entgens dis da test cun aua ei vegniu caschau l'emprema ga. Naven da gievgia vegn produciu tenor plan. Mintga di vegn furniu cheu rondund 6000 kg latg da bio che vegn elavurau en emprema lingia a caschiel da muntogna grischun. Entochen che la producziun funcziuna tenor plan ha ei num adattar en emprema lingia la software dils indrezs. Il president dil cussegl d'administraziun dalla Sennaria Surselva SA, *Roman Calvadetscher*, quenta cun ina fasa da test da duas entochen treis jamnas. La cascharia ei concepida per ina producziun maximala da 2,8 milliuns kg



Pader Vigeli Monn ha benediu il mardis avonmiezdi la cascharia regionala nova a Mustér/Salaplauna.

FOTOS H. HUONDER

latg per onn. La partenza vegn fatga cun in quantum da 1,6 milliuns. Il latg deriva da 25 purs dallas vischnauncas da Sursai, Trun, Sumvitg, Mustér e Tujetsch. Il stabiliment ed ils indrezs construi ed installai a Mustér/Salaplauna correspundan alla pli nova tecnologia. Leutier s'audan era ils dus preuls cun capacitads da 6500, respectivamein 1300 liters. Funcziunau fetg bein ha era la colligiaziun cun

il niev scaldament Recal. «Ils responsabels da quell'interpresa han prestau excellenta lavur e saviu furnir a nus l'energia duas jamnas pli baul che previu», di Roman Calvadetscher. Fertion che la cascharia sco tala ei semtgada per la producziun ed ils tschalers per magasinar il caschiel han singulas parts digl entir baghetg aunc da vegnir finidas ils proxims dis.

Construcziun en otg meins

L'entschatta 2010 ha la Sennaria Surselva SA decidiu d'ereger la cascharia regionala nova a Mustér/Salaplauna. Persuenter ha ella concediu in credit total da 6,7 milliuns francs. Sco quei ch'igl ei vegniu puntuau cun occasiun dall'emprema badelada l'entschatta avrel 2010 duei ella daventar la pli biala e funcziunala cascharia dall'entira Europa. Ina emprema egliada conferma ch'ils planisaders cun igl architect *Gion A. Caminada* da Vrin alla testa han fatg tut il pusivel per contonscher quei scopo. Il baghetg cumpeggia treis parts principals. Quella dalla producziun ensiara las pusseivladads da magasinar il latg e l'elavuraziun da quel. Ina secunda part essenziala pertucca ils treis tschalers da caschiel cun arviul. Els ein vegni construi cun tievlas per aschia garantir in contu-

orn natural. Ils tschalers porschan plaz a rodund 12 000 magnuccas. Ina tiarza part dil baghetg survecha sco stizun. Ella cascharia a Sedrun ei vegniu produciu entochen la fin d'october. Dapi lu ha l'Associazion cascharia Mustér furniu il latg a Nufenen e Breil. Era quellas produceschan – sco naven dad ussa la cascharia a Mustér – caschiel grischun da muntogna. Ch'ins ha stuiu terminar la producziun a Sedrun gia igl october ha in motiv principal: L'infrastructura dalla cascharia pudeva buca pli satisfar alla pretensiuns dalla higiena.

Equipa cumprovada

Il team da signuns ch'ei responsabels per la producziun ella cascharia regionala nova a Mustér ei engaschus dall'Associazion cascharia Mustér gia dapi la primavera. El consista dil meister-signun *Peter Limacher*, oriunds da Ruswil el cantun Lucerna, *Mathias Ess*, oriunds digl Allgäu en Germania e *Joel Barbosa* (33), oriunds dil Portugal. Per l'administraziun ei *Silvia Buchmann* responsabla en ina piazza parziala da 50 pertschien. Per garantir a lunga vosta persunal qualificau per la cascharia vegn la Sennaria Surselva SA a scaffir ina piazza d'emprendisadi per in tecnolog da latg. Quella ei gia stada publicada.



Il team dalla Sennaria Surselva SA: Da sen. Mathias Ess, Silvia Buchmann, Joel Barbosa ed il cau-signun Peter Limacher.

Disciplina e fairplay

Acziun da fairplai dalla US Schluein Glion

■ (anr/gv) L'emprema equipa da ballapei da Schluein Glion fa la pausa d'unviern sil secund plaz en gruppa 1 da tiarza ligia. Sevelen meina la tabella cun dus puncts avantatg. Era ella tabella da fairplay ei l'equipa trenada d'*Urs Casutt* sin in dils emprems plazs. El cumbat per bal e puncts datti denton mintgaton muments ch'ils giugadurs damognan buca diltut il temperament. Las consequenzas ein las cartas melnas e cotschnas digl arbiter. Tier il fairplay pretenda il trenader da ses giugadurs era disciplina el trenament. Giugadurs che mauncan senza motiv ni che vegnan memia tard ston pagar in castitg en fuorma da daners. Quels daners ha l'uniun cun *Simon Lutz* sco president duvrau per ina acziun da fairplay e surdau 500 francs all'Argo a Glion. Els daners duain vegnir duvrai per activitads el temp liber.



Da seniester **Simon Lutz** (president US Schluein Glion), **Urs Casutt**, trenader dall'emprema equipa, **Placi Degonda** (Argo Glion) e **Sandro Derungs**, giugadur dall'emprema equipa.

MAD

■ MUSTÉR

Grond success per la Reka

(anr/hh) La Reka – la numera 1 per vacanzas da famiglia – sa mirar anavos sin in onn 2010 encorunau da success. Entochen la fin dalla stagion da stad ha ella contonschiu 950 000 pernottaziuns, quei che correspunda ad in augment dad in pertschien en cumparegliaziun cun igl onn precedent. Grond success ha era il vitg da vacanzas dalla Reka a Mustér/Acletta giu la stad vargada.

En cumparegliaziun cun la stad 2009 ha il diember total da pernottaziuns saviu vegnir augmentaus per 9,8 pertschien sin 28 898. La Reka porscha a Mustér 52 habitaziuns da vacanzas confortablas.

Fetg apprezzai vegnan il bogn curettg, il survetsch d'affittaziun d'artehels per affons pigns e las numerusas localitads e plazs per far giugs e sedivertir. Grazia al survetsch gratuit dil program da famiglia Rekalino per ils affons han ils geniturs la pusseivladad da laschar survigilar lur affons durant entginas uras ed aschia guder sez il contuorn e la purschida. Il resultat plascheivel che la Reka ha contonschiu a Mustér ei era d'attribuir per part alla purschida speciala «Disentis Plus». Quella cumpeggia denter auter in pass dall'jamna gratuit dalla Viafier retica. Varga 3513 carschi ed affons han passentau lur vacanzas el vitg dalla Reka a Mustér.

Tier in cuoz da 184 dis ei mintga habitaziun stada occupada ella media 119 dis. Quei correspunda ad ina occupaziun da 64,7 pertschien. Da quella occupaziun profitescha l'entira regiun.

Tenor igl Uffeci federal per statistica dat mintga hosp d'ina habitaziun da vacanzas ora supplementarmein sper l'affittaziun dalla habitaziun ella media 55 francs per di. Ils hosps dalla Reka contonschan pia ina sviulta da 1,59 milliuns francs ella regiun.

■ MUSEUM REGIONAL

453 affons als luvratoris

(anr/gv) A caschun dalla dieta dils menaders da museums a Flem il venderdis vargau ha *Carin Cadonau* referiu dils luvratoris per affons purschi el Museum regional a Glion. Quels luvratoris han 453 affons visitau la stad vargada. El rapport dil gliendisdis en La Quotidiana steva il diember da 30 affons. Ins vegli perstgisar.

■ BALLAPEI

Vacanzas da ballapei per l'endisshavla ga

(anr/gv) Per l'endisshavla ga organisescha il Club da ballapei Domat dils 24 tochen ils 29 d'avrel la jamna da ballapei per affons e giuvenils da siat tochen 16 onns. Puspei spetgan ils organisaturs 250 affons alla jamna ch'entscheiva il gliendisdis Pastgas. L'equipa da juniors da Domat meina il camp da vacanzas en collaboraziun cul trenader tudestg *Bernd Voss* e GC Camps. Sco ils organisaturs puntueschan ei il camp da ballapei ina completaziun dil trenament els clubs e buc ina concorrenza. Il plascher dil ballapei stetti el center. Ils trenaders licenziai dalla Tiaratudestga e dalla Svizra treneschan en gruppas da 10 tochen 12 partecipants. Els trenaders muossan buca mo il trics cul bal, mobein era co ils sportists han da secunter sil plaz e sper il plaz. Il camp da ballapei per affons e giuvenils ei ina part centrala dil Club da ballapei Domat.